

ANM emite lisensa ba MRT halo peskiza mineral metáliku iha munisípiu tolu



Autoridade Nasionál Mineral (ANM) entrega lisensa Ambientál no Rekoñesimentu ba atividade peskiza rekursu mineral Metálika iha munisípiu Bobonaro, Liqiçá no Covalima. Imajen Tatoli/Sérgio da Cruz.

BOBONARO, 24 maiu 2024 (TATOLI)-Autoridade Nasionál Mineral (ANM), sesta ne'e emite lisensa ambiental no rekoñesimentu ba empresa estatál Murak Rai Timor (MRT) E,P atu halo atividade peskiza mineral metáliku iha munisípiu tolu hanesan; Bobonaro, Covalima no Liqiçá.

Prezidente ANM,EP, Rafael de Araújo, hateten rekoñesimentu ne'e hanesan faze inísiu ida atu halo estudo preliminaríu ne'ebé mak sei determina prosesu boot ida ne'ebé ke sei tuir mai.

“Sira halo estudo to’o iha Suai ne’ebá tanba dook oituan, sira dehan lae extensaun rekursu ne’e halai tan ba Suai no kontinua husi Bobonaro ba tan Suai, entaun sira bele extende tan, hanesan mós iha Liqiçá, kuandu ida ne’e ita falla, ita lahatene ona rekursu ida-ne’e iha ka lae, ne’e prosesu ki’ik-oan,” nia hateten iha Cruz Vermelha Filial Maliana.

Maibé importante tenke servisu hamutuk tambe rekursu ida-ne’e na’in mak ita hotu.

Nia husu Prezidente Autoridade Munisipál atu hatutan informasaun ba líder komunitária sira hodi bele koopera no kolabora ho empresa MRT,EP nune’e atividade peskiza ne’e bele la’o ho dí’ak no susesu.

Prezidente MRT, EP, José Manuel Gonçalves, orgulu tanba hetan konfiansa husi governu atu implementa projetu ne’e iha fatin haat hanesan Fahilebo iha munisípiu Liqiçá, Lepo iha munisípiu Covalima no postu administrativu Maliana no suku Ai-Asa, postu administrativu Bobonaro.

Nia fiar katak ba oin sei servisu hamutuk ho Konsellu Veteranu atu fornese informasaun ho kualidade ne’ebé bele prienxe rekizitu no regulamentu ne’ebé hatuur ona iha lei inan.

“Ami haree katak estudo ne’ebé tuir informasaun ami asesu, hatudu katak iha ita-nia munisípiu tolu ne’e iha informasaun ba prienxe mineral sira ne’e tanba ne’e mak motiva ami atu foti pasu ida ho autoridade, atubele hahú halo estudo inísiu,” nia hateten.

Empresa estatál ne’e iha vontade ba halo estudo ne’e hodi bele atinje objetivu estratéjiku kurtu no médiu prazu kona-ba atu halo dezentvolvimentu explorasaun rekursu ninerál iha Timor-Leste.

MRT, EP hakarak investe tempu ba setór ne’e tanba haree katak Timor-Leste nia balansu fonte enerjia ba oin sei depende maka’as ba explorasaun rekursu mineral.

“Ita agora tama hela ba iha faze tranzisaun, faze ida-ne’ebé mundu atu muda fonte enerjia husi enjerjia sira ne’ebé emite karbonu maka’as ba emite karbonu zero,” nia hateten.

Sekretáriu Autoridade munisipál Bobonaro ba Asuntu Sosial, Júlio Carvalho Caero, konsidera tividade ne’e importante tebes nune’e ba futuru rekursu mineral no metálika sira iha munisípiu Bobonaro bele ona halo explorasaun.

“Ami Bobonaro iha rikuso in mineral, ita haree maran hela mas iha laran buat barak mak iha, diamon, emas no gás,” nia dehan.

Prezidente Autoridade Munisipiu Covalima, Miguel Armanda Cardoso, konsidera atividade peskiza ne’e importante tebes tanba rekursu mineral no metáliku sira ema haree hanesan buat la vale.

Prezidente Autoridade Munisipiu Liqiçá, Paulino Ribeiro, prontu fó apoia másimu ba ekipa MRT tanba Liqiçá mós iha poténsia ba rekursu mineral no metálika.

Tarjetu ba peskiza ne’e iha munisípiu Bobonaro no Covalima fokus liu ba mineral terras raras, baze no precious metal no iha Liqiçá, Fahilebo kaolin.

Enkuantu fatin sira-ne’ebé indika atu halo peskiza mak hanesan iha postu administrativu Maliana, hahú husi Ritabou, Raifun, Holsa, Tapo-Memo, Saburai.

Husi parte postu administrativu Bobonaro, Ai-Asa, Oe-leu, Mali-lait, Sibuni, Atuaben, Lourba, Lour, Kota-Bo’ot, Kolimau.

Parte Munisipiu Covalima mak hansas Lepo no Zumulai. Munisipiu Liqiçá iha postu administrativu Bazartete mak iha suku Fahilebo, Ulmera no Leorema.

Jornalista: Sérgio da Cruz Editor: Evaristo Soares Martins